



20 DEC, 2024

Perbaiki kelemahan agensi sebelum wujud rangkaian berpusat

Berita Harian, Malaysia

Page 1 of 3

Kekang jenayah kewangan

Kaji kelemahan sistem, peranan setiap agensi

Kerajaan wajar memahami kelemahan sistem semasa, termasuk peranan setiap agensi berkaitan membanteras jenayah kewangan seperti Jabatan Siasatan Jenayah Komersial Polis Diraja Malaysia (PDRM), Bank Negara Malaysia (BNM) dan Suruhanjaya Sekuriti (SC) sebelum melaksanakan satu rangkaian berpusat babitkan agensi sedia ada. Pengerusi Suruhanjaya Integriti Agensi Penguatkuasaan (EAIC), Tan Sri Dr Ismail Bakar tegaskan kajian perlu dilaksanakan untuk menilai apa yang tidak berfungsi dengan baik dan memaksimum kekuatan dalam struktur sedia ada. **Oleh Ercy Gracella Ajos → Nasional 2**





20 DEC, 2024

Perbaiki kelemahan agensi sebelum wujud rangkaian berpusat

Berita Harian, Malaysia

Page 2 of 3

Perbaiki kelemahan agensi sebelum wujud rangkaian berpusat

Struktur penguatkuasa perlu ditambah baik bagi banteras jenayah kewangan

Oleh Ercy Gracella Ajos
ercy.gracella@bh.com.my

Kuala Lumpur: Kelemahan fungsi dalam struktur penguatkuasaan oleh pelbagai agensi kerajaan yang sedia ada, perlu dikaji terlebih dahulu sebelum cadangan mengkaji keperluan rangkaian berpusat bagi menangani jenayah kewangan di negara ini dibuat.

Pengerusi Suruhanjaya Integriti Agensi Penguatkuasaan (EAIC), Tan Sri Dr Ismail Bakar, berkata adalah penting memahami kelemahan sistem semasa, termasuk peranan agensi seperti Jabatan Siasatan Jenayah Komersial Polis Diraja Malaysia (PDRM), Bank Negara Malaysia (BNM) dan Suruhanjaya Sekuriti (SC).

"Kajian terhadap struktur sedia ada ini perlu dilaksanakan untuk menilai apa yang tidak berfungsi dengan baik atau pada tahap maksimum.

"Hanya selepas itu, kita boleh tentukan sama ada rangkaian berpusat ini benar-benar dapat memperbaiki penguatkuasaan jenayah kewangan di negara ini," katanya kepada BH.

Terdahulu BH melaporkan, Suruhanjaya Pencegahan Rasuah Malaysia (SPRM) mencadangkan satu rangkaian berpusat membabitkan beberapa agensi utama diwujudkan segera dalam usaha menangani jenayah kewangan yang semakin mencabar sehingga menyebabkan kerugian besar kepada negara.

Rangkaian bersepadu dicad-

ang menyatukan institusi kewangan, agensi kawal selia dan agensi penguatkuasaan, selain agensi swasta supaya usaha memerangi jenayah rasuah, kewangan dan perubahan wang haram dilaksanakan dengan lebih menyeluruh dan berkesan, selain mengelak pertindihan peranan antara agensi berkaitan.

Ketika ini, selain SPRM, Kementerian dan agensi yang terbabit menangani jenayah kewangan ialah PDRM; BNM, Kementerian Perdagangan Dalam Negeri dan Kos Sara Hidup (KPDN); Lembaga Hasil Dalam Negeri (LHDN); Suruhanjaya Komunikasi dan Multimedia Malaysia (MCMC) dan Agensi Keselamatan Siber Negara (NACSA).

Timbalan Ketua Pesuruhjaya (Operasi) SPRM, Datuk Seri Ahmad Khusairi Yahaya, dilaporkan memandangkan isu jenayah kewangan rentas sempadan, terutama pengubahan wang yang semakin kompleks, kerjasama di antara agensi utama itu perlu diwujudkan segera.

Katanya, pada era semakin mencabar ini, SPRM menyedari kepentingan kewujudan satu rangkaian yang berupaya menyatukan institusi kewangan, agensi kawal selia (regulator) dan agensi penguatkuasaan.

Peranan agensi tak jelas

Penganalisis jenayah, Shahul Hamid Abdul Rahim, yang sependapat dengan Ismail, berkata kelemahan, termasuk peranan agensi penguatkuasaan sedia ada yang tidak jelas adalah antara aspek perlu diperbaiki terlebih dahulu sebelum menubuhkan rangkaian bersepadu bagi menangani jenayah kewangan yang semakin mencabar.

Beliau berkata, sehingga kini masih ramai belum jelas mengenai aspek penguatkuasaan undang-undang dalam mencegah jenayah kewangan yang dijalankan BNM.



Katanya, orang ramai perlu dedahkan peranan dan tanggungjawab setiap agensi dalam mengawal selia isu membabitkan jenayah kewangan dan rasuah.

"Sehingga kini, masih tidak jelas bagaimana agensi menjalankan peranan mereka dalam menyelesaikan isu membabitkan jenayah kewangan.

"Kebanyakan kes yang kita dengar seperti kes mencairkan duit diketahui secara luaran. Kita tidak tahu duit ini untuk apa. Perkara ini perlu jelas," katanya.

Katanya, Akta Pencegahan Pembinaan Keganasan dan Hasil Aktiviti Haram 2001 (AMLA) sehingga kini juga tidak jelas bagaimana undang-undang ini berfungsi.

"Kita ada AMLA, tapi undang-undang ini pun lemah. Tidak ada satu kes pun diselesaikan mengguna AMLA. Hanya tangkapan dibuat mengikut AMLA, tapi akhirnya senyap.

"Justeru, agensi kerajaan sedia ada seperti BNM, SPRM dan PDRM perlu menjelaskan peranan masing-masing dalam menangani jenayah kewangan.

"Sekarang kita bimbang mengenai rasuah membabitkan agensi termasuk perubahan wang haram tetapi masyarakat umumnya kena tahu pelaksanaan agensi.

"Bila peranan sudah jelas, barulah rangkaian bersepadu yang mahu ditubuhkan dapat berfungsi dengan baik, seterusnya memudahkan masyarakat melaporkan masalah atau isu membabitkan jenayah kewangan dan rasuah," katanya.

Sehingga kini, masih tidak jelas bagaimana agensi menjalankan peranan mereka dalam menyelesaikan isu membabitkan jenayah kewangan. Kebanyakan kes yang kita dengar seperti kes mencairkan duit diketahui secara luaran. Kita tidak tahu duit ini untuk apa. Perkara ini perlu jelas

Shahul Hamid Abdul Rahim,
Penganalisis jenayah





20 DEC, 2024

Perbaiki kelemahan agensi sebelum wujud rangkaian berpusat

Berita Harian, Malaysia

Page 3 of 3

SUMMARIES

Kekang jenayah kewangan

Kaji kelemahan sistem, peranan setiap agensi

Kerajaan wajar memahami kelemahan sistem semasa, termasuk peranan setiap agensi berkaitan membanteras jenayah kewangan seperti Jabatan Siasatan Jenayah Komersial Polis Diraja Malaysia (PDRM), Bank Negara Malaysia (BNM) dan Suruhanjaya Sekuriti (SC) sebelum melaksanakan satu rangkaian berpusat babitkan agensi sedia ada.